

Portrait dad ina mattatscha dad 11 onns dall'Africa dil Sid

Hallo ensemen

Jeu sun Nonkululcko Kunene. Jeu habiteschel en in marcau da hettas datier dallas minas da cotgla. Ei dat circa 70 minas sin nies territori. Saveis vus atgnamein, tgei che minas da cotgla ein? Gie endretg, cotgla drovan ins per scaldar ni per producir electricitad. Cotgla anflan ins ella tiara. Ella ei vegnida formada duront milliuns dad onns ord veglias restonzas da plontas. Cotgla ei nera e tier l'explotaziun datti bia puorla. Perquei ei noss'aria purlusa e tschuffa e toffa mintgaton sgarscheivel. Mo cun cotgla san ins gudignar detg bein. Jeu haiel naturalmein era ina famiglia, leutier s'audan mia sora da 9 onns e miu frar da 4 onns e naturalmein mia mumma. Miu bab ei gia dapi treis onns naven, perquei ch'el leva encurir lavur. All'entschatta dallas minas da cotgla han ins empermess a nus lavur ella minas, mo miu bab ha buca anflau lavur leu. Cheu vivan insumma biaras familias senza bab. Persuenter viva aunc miu aug tier nus. Mia mumma mira per nus e va, ton sco pusseivel a luvrar. Deplorablamein ha ella negina lavur cuzzonta. Mintgaton lavura ella sil baghetg ni gida en ina firma da catering - che cuschina per gliedud reha ni firmas - e survescha lu talas. Ella fa tut, la caussa principala ei ch'ella ha lavur e gudogna enzatgei. Cura ch'ella lavura mirel jeu da mes fargliuns.

Mia sora pitescha specialmein pervia dallas minas da cotgla. Ella ha savens eglis inflammai e mintgaton vesa ella bunamein nuot.

Nus tuts essan savens malsauns. Ins di, ch'en nossa cuntrada seigi la mendra aria dall' entira Africa dil Sid. Mia mumma ed autras dunnas ein s'unidas en ina gruppa. Ellas cumbattan per che nus vegnien tier nies dretg.

Jeu vi gie buca selamentar, jeu astgel numnadamein ir a scola. Quei secapescha buca da sesez. Per la scola duvrein nus ina uniforma e quella sto nossa mumma pagar. Mo mintgaton ha ella gnanc avunda daners per pagar il quen pil current.

Jeu haiel ina liunga via da scola, dapli ch'ina ura cuoza quella a pei. Per quei level jeu la damaun allas sis. Mia via da scola ei buca mo liunga mobein era aunc malsegira. Jeu stoi numnadamein traversar in'autostrada cun sis vials. Na, buca sur ina punt sco vus fageis quei. Jeu stoi cuorer spèrt per traversar l'autostrada e buca vegnir sut in auto en.

Miu rom preferiu ei engles. A casa discuorel jeu zulu. Matematica quetel jeu buc schi bien. Cu jeu sundel gronda lessel jeu daventar giurista per gidar mia glied da vegnir tier lur dretg encunter ils possessurs dalla minas.

Ussa ha nossa casa puspei inagada balluccau sgarscheivlamerin sco tier in tiaratriembel. Quei schabegia sch'ei siglientan ni foran ellas minas da cotgla per vegnir tier nova cotgla. Nossas hettas ein pli veglias che las minas da cotgla. Ellas ein buca baghegiadas fetg bein. Dallas schluppentadas ha nossa casa gia survegniu sfendaglias e las finiastras ein curdadas ora. Nus havein negins daners per reparar ellas. Mia mumma di ch'ei detti ina lescha che prescriba ch'ils luvriers ellas minas stuessen avisar nus avon ch'ei siglientan per che nus sappien bandunar ad uras las casas. La casa savess gie sballunar. Mo quei fan els buca. Nus essan ad els tuttina. Igl ei ad els era tuttina ch'els produceschan cun fiug gas da tissi che fan malsauns nus e ch'els tartognan noss'aua. Il principal ei ch'els gudognian biars daners. Per quei eis ei impurtont che nossas mummas semettan en per nus.

Sche nus hagien siemis per ina megliera veta? Gie, vus saveis segir simaginar tgeinins.

Forsa saveis vus gie gidar nus e malegiar in dessegn da nos siemis per che biaras personas tier vus endrieschan da nus.